

Duj wurdena

Frejdasa karjeden jagorja romane jagatyr, bagen cirykle. Kajś dur pał baro pani zadział khamoro, pał na hara jaweła rat.

Sys dawa hara, hara daleske – bagełys pośtył jag a sare Roma bešte sys paś łatyr i siunenys paramisia. Romen sy jak bary parmisia, sai phure Roma ophenen ternenge dzia dział dawa duredyr dadendyr te ćhawore.

Te ciry kaj wesien na sys jangił ani pałuj Roma tradenys gił pestyr. Duj semency Warmijaki i Bosaki wytradyne duje swetoskre rygendyr i rakte pe te baro weś sało te celo dzipen na dykte. Manusia kaj doj basienys sys łaćsie i mišto przyline Romen a kharenys pe Lachy. Roma poćsingardyne pes zorałez i roztradyne pe te bary holin. Warmijaki i Bosaki hara bersia na rakirenys pesa. So duj semency sys ziakirde kaj ławyr jangił jaweła i przemangeła.

Sałoś dywes Bosaki terdzine paś baro pani dykte kaj pe ławyr ryk sy Roma terde wurdenenca. Kamenys te przedział te one ne pani sys za hor i so duj semency pes na rakte. Roshacikirde jaga i line te bageł i te khełeł ale siunen kaj ławyr Roma adzia korkores bagen i khelen. Dzia przedzianys dywesa i racia.

Phure Bosakos sys desiuduj siukar ćhaja, a Warmijakos desiuduj ćhawe. Raciencia terne besienys paś pani soduje rygendyr i bagenys peske romane gila. I dzia terne pe pokamde. Dad ćhajengro dykcia kaj zakamde pe te Warmijakiendyr. Przyphendzia kaj nani łenge frej te hylcioł. Ćhajenge sys pharo, rowenys i mangenys peskre dades, ne jow na kamelys łen te siuneł.

Przegeja ciro but na but. Baro pani opeja Warmijaki przegene pe ławyr ryk pani i wyciorde ćhajen. Syr łengro dad pe dodzindzia sys zorałes holinakro. Skendyne pe sare Bosaki i gene te rodeł ternen, rodenys celo dywes i rat ne na rakte. Jek phury romani phendzia kaj so posili dasało ciro terne na rysiona sy romandune. Phuro Rom sys holinakro kaj ćhaja łes na kandyne ne te do wa ciro soś pes kerdzia ... phuro Warmijako przegeja pe ławyr ryk pani i dzia phendzia:

- Myro pszał, nikon jamendyr na rypyreł pał so jamen poćsingardyjam. Zabyskiras da holina i frejdziiwas jamara ćhaworengre bahciasa. Mek dzidzion bahtałes.

Bosako shalija kaj so duj semency hyrja kerenys i dzia odphendzia:

- Mišto rakires, mek Deweł deł baht jamare ćhaworengre.

Terne nahara rysine a łangre Dada kerde baro biaw. Sare Roma hanys, pienys i frejdzionys. Dale cirostyr Warmijaki i Bosaki dzide pesa sy khetane dre baht i sastypen.